

Visoka škola "CEPS – Centar za poslovne studije", sa sjedištem u Kiseljaku, u ul. Josipa Bana Jelačića bb, čiji je zastupnik Direktor Pred. VŠ Mirzo Selimić, s jedne strane (u daljem tekstu: Visoka Škola)

i

Javna zdravstvena ustanova Univerzitetski klinički centar Tuzla, sa sjedištem Tuzli, u ul. Trnovac bb, čiji je zastupnik direktor Doc.dr.med.sci. Nešad Hotić, s druge strane (u daljem tekstu: Centar),

zaključili su dana 20.09.2016. godine

UGOVOR O AKADEMSKOJ, NAUČNOJ I POSLOVNO-TEHNIČKOJ SARADNJI

Član 1.

Ugovor je zaključen s ciljem međusobne saradnje dvije ustanove u budućem procesu obrazovanja, naučno-istraživačkog rada i drugih poslova u okviru registrovane djelatnosti.

Član 2.

Ugovorne strane će nastojati da razvijaju međusobne veze prema principima zajedničke koristi, opšteg društvenog interesa, te zajedničke komplementarne djelatnosti visokog obrazovanja.

Ugovorne strane će uložiti najveće i iskrene napore da se ovaj ugovor realizuje na akademskom nivou.

Član 3.

Ciljevi saradnje:

1. razvoj i podsticanje zajedničkih istraživanja, seminara, međunarodnih konferencija, uz napore da se obezbijede eksterni izvori finansiranja;
2. razvoj razmjene znanja i naučnih informacija kroz recipročnu razmjenu naučnih i stručnih publikacija, e-publikacija, akademskog materijala, stručnih izvora i drugih resursa;
3. ohrabrivanje i drugih akademskih projekata i aktivnosti upućenih prema drugim akademskim partnerima i ostalim izvorima finansiranja neprofitnih i akademskih projekata i
4. podsticanje i drugih akademskih aktivnosti za koje se obje ugovorne strane slože da su od zajedničkog interesa i koristi.

Član 4.

Područje saradnje će uključivati bilo koje akademske i druge naučne odnose, stručne programe koji su akreditovani i registrovani u bilo kojoj od ustanova u cilju razvoja zajedničkih aktivnosti u nastavnim i akademskim oblastima koje su od obostranog interesa, na bazi kvaliteta i reciprociteta.

Ugovorne strane će podnositi prijedloge vezane za zajedničke projekte prema odredbama ovog ugovora putem rukovodećeg izvršnog osoblja ili putem nadležnog akademskog osoblja.

Visoka škola je odgovorna za akreditaciju fakulteta u zemlji i inostranstvu. Centar može pomagati u tom procesu, ali odgovornost je isključivo na Visokoj školi.

Član 5.

Ugovorne strane obostrano izjavljuju da će Centar omogućiti obavljanje stručne prakse za studente Visoke škole na studijskom programu "Zdravstvene studije".

Član 6.

Stručna praksa studenata obavljaće se po utvrđenom nastavnom planu i programu na I ciklusu studija Visoke škole na studijskom programu "Zdravstvene studije" na klinikama, poliklinikama, zavodima i bolničkoj apoteci Centra.

Član 7.

Visoka škola će prije početka nastave, u skladu sa nastavnim planom i programom za svaku akademsku godinu specificirati potrebe prema broju studenata za obavljanje stručne prakse i dostaviti Centru spiskove studenata.

Centar će studentima Visoke škole obezbijediti kvalitetno i bezbjedno izvođenje stručne prakse, u skladu sa raspoloživim materijalnim, prostornim i kadrovskim resursima, uz primjenu i provođenje mjera zaštite na radu i zaštite od požara prema važećim propisima.

Član 8.

Visoka škola je obavezna osigurati da svi studenti prije obavljanja stručne prakse izvrše obaveznu sanitarnu obradu i dostaviti o tome dokaz Centru (sanitarna knjižica), te da imaju čiste uniforme i čistu obuću za vrijeme obavljanja stručne prakse u Centru.

Centar će studente Visoke škole blagovremeno, na primjeren način, upoznati sa propisanim kućnim redom.

Član 9.

Ukoliko je nastavnim planom i programom predviđeno da studenti dio stručne prakse provode u zoni jonizirajućeg zračenja, Visoka škola je obavezna osigurati da svi studenti obave prethodni zdravstveni pregled, saglasno Pravilniku o zdravstvenom nadzoru lica profesionalno izloženih jonizirajućem zračenju ("Službeni glasnik BiH", broj 68/15).

Član 10.

Mentora stručne prakse određuje Centar.

Član 11.

Visoka škola se obavezuje da obezbijedi da se studenti za vrijeme obavljanja stručne prakse ponašaju u skladu sa visokim etičkim i moralnim standardima, kao i da se prema opremi Centra ponašaju sa pažnjom dobrog domaćina.

Visoka škola je odgovorna za svaku štetu koju njegovi studenti pričine Centru u toku obavljanja stručne prakse u prostorijama Centra.

Visoka škola je također obavezna osigurati studente za slučaj eventualne povrede u toku obavljanja stručne prakse u prostorijama Centra.

Član 12.

Ugovorne strane su se sporazumjele da će Visoka škola Centru, na ime korištenja opreme, sredstava za rad, potrošnog materijala kao i ostalih materijala neophodnih za kvalitetno obavljanje stručne prakse, plaćati naknadu u iznosu od 200,00 KM + PDV po studentu za stručnu praksu u trajanju od 30 dana, odnosno 100,00 KM + PDV po studentu za stručnu praksu u trajanju od 15 dana.

Naknadu iz stava 1. ovog člana Visoka škola će plaćati prije početka obavljanja prakse, a na osnovu fakture koju će Centar ispostaviti prema spisku studenata dostavljenom od strane Visoke škole u skladu sa članom 7. stav 1. ovog Ugovora.

Član 13.

Ovaj Ugovor se zaključuje za akademsku 2016/2017. godinu.

U periodu važenja Ugovora svaka ugovorna strana ima pravo isti otkazati, uz obavezu da o namjeri otkazivanja pismenim putem obavijesti drugu ugovornu stranu najkasnije 30 dana prije dana s kojim namjerava otkazati Ugovor.

Ugovorna strana koja je pretrpjela štetu zbog neispunjenja obaveze druge ugovorne strane ima pravo na naknadu štete.

Član 14.

Ovaj Ugovor je zaključen u četiri (4) istovjetna primjerka, od kojih svaka ugovorna strana zadržava po dva (2) primjerka.

Član 15.

Ugovorne strane će eventualne sporove rješavati sporazumno, a ukoliko to ne bude moguće, za rješavanje takvih sporova biće nadležan Općinski sud u Tuzli.

Za Visoku školu
DIREKTOR
Pred. VŠ Mirzo Selimić

Broj: 1435/16
Tuzla, 20.09.2016. godine



Za Centar
DIREKTOR
Doc.dr.med.sci. Nešad Hotić

Broj: 1-233/16
Tuzla, 20.09.2016. godine

